

## Stumpien of stumpert?



*Zunig-eid met vlijt, bouwen uzén as kestelen* . . . Ken ie dät gezegde nog?

Mien Va voegen der altied nog wat an toe . . . En *van te weinig wassen krie'j, luuzen as kemelen!* Met luuzen en (mense-)vlooién ad die man toch al niet te völle op, umdät ij der te vake ongewenst met wier confronteerd. En as wi'j dan weer is gien zin adden umme naor de kapper te gaon wis ij oe ook nog te vertellen dät *lang öör en luuzen* 't ienigste bint in dit lèven dä-j gratis kriegén; vänders niks. Vandaag bin-k weer is een keer bi'j de kapper, naor binnen elopen. Ik mutte der toch weer is een keertien an geleuven. Niet umda-k bange bin da-k luuzen op zolle lopen, maer Sunterklaos is al weer in 't land, de Kärtsdaegen kommen der weer an en veur da-j der ärg in ebben is 't jöör al weer umme en dan kan-k 't niet maken *met 't geld van de kapper in de zak* te blieden *lopen*. Dan der bi'j . . 't was gewoon neudig en de kapper krèg ook al gien kårst-pakket. Ik belle nooit veur ofspraaken, maer lope der altied èven naor binnen umme te vraogen of ij nog een keertien tied ef mien kop te renoveren en dan gef ij mi'j wel een tied da-k ter terechte kanne. Ofspraaken skrif de kapper altied netties in een ofspraakenboek.

Zo ook now . .

*Vandaag veer uur? . . De böörd ook? . . Jao!*

En dan wörrén dät netties noteerd.

15:00	De zunig-eid
15:20	van knopent
15:40	
6:00	Görendrogies
6:20	+ Board

En oewel ij, de kapper, een rasechte Zwollenaer is en dus gien Amerikaan, skrèf ij nog met potlood.



As der een keertien een ofspraake stiet die um wat veur reden dan ook niet kan deurgaon, dan kan die zomaer weer wörrén uut-e-stuft.

Ik kieke nog is een keertien . . en dan zie ik mi'j döör zo'n alderbårsténs klein stumpien potlood lègen, da-k mi'j ofvroege oe de kapper die nog vaste kan olen en der met kan skrieven.



Now dät kan e ! En döör op deurgaond gaf ij mi'j uutleg dät 't de kunst is (lèès .. zien strèven) net zo lange deur te gaon . . . dät allenig 't rooie endtien nog aover is. *En dät giet ij an görendrögien uutlègen?* . . Dan ku-j der donder op zègen dät die der met an de loop giet.



Want ier trappe ik netuurlijk niet in.

As de kapper dät nog vänders zol willen opsliepen kan ij 't potlötien niet ies meer in de puntelieper dreijen.

Maer is de kapper now een stumpert umdät ij stumpies potlood töt 't ende blif gebruiken, is 't ärmoe umdät ik der te weinig komme, of is 't ook inderdaod de kunst?

Ik aole 't ter maer op dät ij met zien gedrag wel weer wat te vertellen ef, want geleuf mi'j . . ik ware eus niet der eersten die 't dörven der wat van te zègen.

Dan zol 't toch töt een kunst ver-even kunnen wörrèn ? . . of toch niet . .

Der bestied al zoies as *potloodkunst* en dan e-k 't niet ies aover tekenwärk.

Zo is ter in Rusland iene *Salavat Fidai* die in staot is umme in de grafietpunte van een potlood uuterst kleine veurwärpies te snieden.

*Ik zweer 't oe* . . dät gao ik em met mien kromme jatten, van zien lang zal zien lèven, niet naodoen.

*Maer mischien kan die Rus dan weer gien Zwols skrieven.*

Ie mutten is een keertien kieken op [www.eyespired.nl/sculpturen-potloden](http://www.eyespired.nl/sculpturen-potloden)

Dan ku-j een kört filmpien zien wöörin de ieffeltoren wört uut-esnejen.



Dus laot ik 't potleutien van de kapper maer wèèn veur wat 't is . . een stumpien potlood . . as mien ofsprake maer stied.

Wedden dät, wanneer ik bi'j die *valderappe* van een kapper wegkomme,

't inies winter giet wörrèn . . . alderbärstems wat kold . . zonder öörmusse.



November 2016

*valt nog wel mèè toch?*

